

Repower fa marcantamain pli pauc gudogn

Il concern d'energia grischun Repower ha prendì mesiras rigurusas per augmentar l'efficienza

DA MARTIN CABALZAR

■ Il concern d'energia Repower ha nudà marcantamain damain gudogn ils emprims sis mais da quest onn. Cumpareglià cun la medema perioda dal 2013 è il gudogn da la Repower sa reduci per 86% sin anc quatter milliuns francs. Sco la Repower communitgescha saja il gudogn stà influenzà da sperditas tar societads affiliadas e dischavantatgs da valutas estras. La svieuta da la Repower è restada bunamain stabila tar 1,96 milliurdas.


Mesiras rigurusas per augmentar l'efficienza

Tuttina è il schef operativ da Repower Kurt Bobst da l'avis che Repower haja cuntanschì cun in Ebit da radund 32 milliuns in resultat operativ respectabel. Las rigurusas mesiras per augmentar l'efficienza hajan gia purtà emprims effects positivs. Progress legraivels haja Repower cuntanschì cunzunt cun ils projects Leverkusen, Chlus e Lagobianco. Ultra da quai haja Repower pudì sa posiziunar adina dapli sco partenari d'interpresa da provediment regionalas.

L'emprim semester da quest onn saja stà caracterisà da pretschs constantamain bass tar il commerzi d'energia. Cunzunt la forza idraulica saja confruntada cun novas sfidas en vista a la malsegirezza sin il martgà d'energia europeic.

«In resultat operativ respectabel»

La prestaziun totala da l'emprim semester 2014 ha muntà ad 1,96 milliurdas ed è uschia praticamain identic cun la medema perioda da l'onn passà. Nagina surpraisa saja la reduziun da 26% sin 32 milliuns da l'Ebit stada, punctuescha Bobst. Da quai èn 19,3 milliuns d'attri-



Sin il martgà d'energia è actualmain tut en moviment. KEYSTONE

buir al martgà svizzer e 21,6 milliuns al martgà talian. Il gudogn reduci dal concern è vegnì influenzà marcantamain da perditas da valuta, da perditas da las interpresa associadas e las reduziuns dals tschains. Entant ch' il gudogn e sa reduci per 86% sin 32 milliuns ha il cash flow legraivlamain pudì vegnir augmentà per 51% en cumparegliaziun cun la medema perioda da l'onn precedent. Quai cunzunt damai che Repower ha miss il focus sin il management da debiturs che ha muntà 46 milliuns en cumparegl cun ils 30 milliuns da l'emprim semester 2013. L'agen chapital e restà stabil cun solids 39%. L'emprim semester da 2014 ha Repower fatg investiziuns da 15 milliuns, 2013 eran quai 33 milliuns.

Resguardond tut las circumstanzas possia il resultat operativ vegnir taxà sco

respectabel, ha commentà Kurt Bobst questa bilantscha intermediara. Favuraivels sajan ils resultats tant en l'Italia, la strategia da sa focussar sin plirs martgads impurtants saja sa cumprovada.

Spargnà rodund 17 milliuns

Tenor il schef da finanzas Stefan Kessler ha il program instradà per augmentar l'efficienza da l'interpresa effectua ina reduziun marcanta dals custs da manaschi. Las mesiras da spargn decididas concernan la simplificaziun da las structuradas, la reduziun numerica dal directori sco er ina reduziun dals ulteriurs custs da manaschi. Tut en tut sa Repower spargnar 2014 radund 17 milliuns. Prendidas en mira èn ulteriuras mesiras, uschia ch'ins quinta per 2015 cun in ulteriur spargn da passa 20 milliuns.

Plinavant ha Repower decidì da sortir da la fatschenta da repartiziun en Germania sin il sector da manaschis mesauns. A perseguitar vinavant vegn Repower dentant il project Leverkusen ed ils dus implants da vent Lübbenau e Prettin. In augment considerabel dad 86% ha Repower cuntanschì tar la vendita da gas.

Fitg precauta vegnia Repower ad esser en il proxim temp cun novas investiziuns. Ins pondereschia era da vender la participaziun da Repower vi da la Swissgrid che ha 3,69 pertschient da las aczias. Questa examinaziun haja l'intent d'augmentar il spazi d'agir finanziar, ha declerà il schef da finanzas Stefan Kessler.

Projects cun buna acceptanza

Malgrà las circumstanzas politicas

pauc favuraivlas persequitescha Repower vinavant ses projects da clav per esser preparà en il mument che las relaziuns dal martgà sa migliereschan. Tant il project da pumpadi Lagobianco en il Puschlav sco il project idraulic Chlus en Partenz pudessian contribuir essenzialmain al provediment d'energia en Svizra sunter la renunzia a las ovras atomaras, è Kurt Bobst persvadi. Il project Lagobianco ha gia retschavì l'approvaziun da la concessiun entras la regenza ed il project Chlus chartia legraivlamain ina buna acceptanza en las regions pertutgadas. Gia han 11 da 12 vischnancas da concessiun approvà il project cun grond surpli. La confederaziun haja classifitgà il project sco «project da relevanza naziunala». L'implant Chlus persul fiss abel da contribuir 11 pertschient a la finamira naziunala davart il provediment d'energia 2035, constatescha Bobst.

Novas schanzas e sfidas

Il schef operativ Kurt Bobst taxescha la situaziun actuala sin il martgà d'energia era sco schanza. Repower veglia augmentar ses engaschament sin il sector da New Tech Business ch'intenda d'optimar il management d'energia cun augmentar il niz per la clientella. Repower surpiglia er adina dapli servetschs per autras interpresa d'energia e quai sin divers secturs. Grazia a las cumpetenzas da las collavuraturas e dals collavuratur, a la forza innovativa, a l'avertadad per cooperaziuns saja Repower posiziunà ordvart bain. Cun sa concentrar sin las atgnas fermezzas e cun realisar consequentamain il program d'efficienza disponia Repower da bunas premissas per dar dumogn cun success a las sfidas futuras, punctuescha Kurt Bobst concludend.